

mundum, & influentias miras: sed per virtutem Solis, Lunæ aliarumque Stellarum; Sic & Cœlum illud nostrum, vel Quinta Essentia, vult & debet ornari Sole splendido, mirabili & occulto, à quo habet incorruptibilitatem, virtutem & calorem vitæ.

Hæc igitur est radix Vitæ, Quinta Essentia nimirum, quam creavit Altissimus in natura ad conservationem 4. qualitatum Corporis humani, sicut Cœlum ad conservationem universi.

Quoniam nimirum in eo Idæa minus immergitur corpori, & sic separatorum majorem habet similitudinem, virtutes etiam habet potentiores in operatione, similes operationi, idææ separatæ. Est enim multum formalis, ideo cùm minima materia plurimum potest. Elementalibus autem virtus quia naturalis est, ut multum agat, multum etiam desiderat materiam. In hac ergo *Quinta Essentia* & *Spirituali Medicina*, quæ est de *Natura* & *Calore* Cœli, & non in natura Mortali vel corruptibili, possibile est verum Medicinæ fontem, conservationem vitæ, restitutionem sanitatis, renovationem Juventutis deperditæ, & serenæ valetudinis optatum invenire, & naturaliter loquendo **NULLA EST IN TOTO MUNDO HAC melior medicina.** In omni enim genere unum quid est, quod primum eo genere gradum tenet; quia ergo hæc Medicina genita est ex incorruptibili & efficaciori Materia, quæ sub Cœlo sit, Anima vel Spiritu Mundi nimirum, omnium cœlestium & terrestrium vires in se continente, ideo purum tenet gradum in ordine
Medi-